

Dr M akan bina 'Tugu Semangat'

JOHOR BAHRU, Rabu — Datuk Seri Dr. Mahathir Mohamad akan membina 'Tugu Semangat' di kawasan cetusan semangat cintakan tanahair yang diilhamkan oleh Datuk Onn Jaafar di Padang Kerajaan Batu Pahat 37 tahun dulu.

Pada mulanya, Perdana Menteri dan Timbalannya, Datuk Musa Hitam dijadual mendarat dan disambut oleh kira-kira 100,000 penduduk di kawasan lapang Kampung Kenangan Datuk Onn, Jalan Bakau Condong jam 10.00 pagi 8 Disember ini.

Bagaimanapun, tempat sambutan diubah ke Padang Kerajaan di depan Kelab Melayu Batu Pahat yang mempunyai banyak kenangan manis dari segi sejarah perjuangan semangat kebangsaan, termasuk soal Malayan Union.

Kalangan sejarawan dan saki-baki pejuang semangat kebangsaan 1946 dikatakan turut hadir dan ingin menyaksikan bagaimana kelab Batu Pahat sekali lagi menyambut pemimpin-pemimpin yang berjuang untuk keadilan dan keba-

jakan rakyat.

Sejarah

Pengkaji-pengkaji sejarah berpendapat, di zaman basikal tayar mati 37 tahun dulu, beribu-ribu rakyat yang cintakan negara memadu semangat menuju Batu Pahat untuk menyatakan sokongan mereka mengutuk Malayan Union.

"Di zaman rakyat hidup dalam serba kedai-fan, mereka sanggup berjalan kaki dan menaiki basikal berpuluh-puluh batu untuk mendengar amanat Datuk Onn."

"Sebelas tahun kemudian, berpuluh ribu rakyat membanjiri Padang Bandar Hilir, Melaka menyambut kepulangan Tunku Abdul Rahman dari London yang membawa berita kemerdekaan negara."

"Kini, di Batu Pahat sekali lagi, warisan Datuk Onn akan disambut. Bukan untuk mendengar berita kemerdekaan atau kutukan terhadap Malayan Union, tapi untuk menjelaskan kepada rakyat betapa kerajaan akan terus berjuang untuk kebajikan mereka."

"Kami percaya, lebih seratus ribu penduduk dan rakyat akan menyambut dua pemimpin yang diamanikan di Kedah dan Johor itu," kata mereka.

Datuk Seri Dr Mahathir akan menyampaikan ucapan di pentas khas, mungkin betul-betul di tempat Datuk Onn berucap 37 tahun dulu. Sebelum itu wakil pemuda akan membacakan ikrar berdiri teguh di belakang pucuk pimpinan.

Perdana Menteri kemudian diiring dalam perarakan besar-besaran ke bangunan Umno Bahagian Semerah.